



Fasnacht 2019

## Mir sin ART | ig!

D ART, e Mäss wo no läbt  
und nid am Defi kläbt  
wie d Giardina, d Basel World oder d Swissbau  
d Mässelaitig macht jo us jedere e Supergau  
fir d Muba het s letschte Stiindli gschlaage  
und mer hän se ins Grab deerfe draage

An dr ART do kauft e jede Gimpel  
wirkligg fascht jede Grympel  
verdätschs Yoko Ono Untertäller  
isch dr Sammler mit em Scheggbuech schnäller  
hets im Vorhang lutter Neegel  
stigt em Sammler sy Peegel

Mir sin ganz ARTig  
studiere s Programm voller ErwARTig  
e Wiirfel ganz verdrugt  
us Röppli nur – es isch veruggt  
wie kame dodrus mache grossi Kunscht  
und bättle um em Sammler sy Gunscht?

Nai, das isch kai bleede Scherz  
das isch volle Röppli-Kommerz  
fir die gstaanzte Papierli  
zahlsch e huffe Gäld, natierli  
und hesch di Kunschtwärgg in d Stuube gstellt  
gheits usenand und du bisch prellt

Au d Fasnacht isch e riese Kommerz  
nur s Gässle isch gratis, kai Scherz  
am Drummeli gits Billjee nur fir d Vipps  
serviert wärde Schämpis und Flips  
do mache mir jetzt au voll mit  
öbs glaube wotsch oder nit:

Gfalle dir unseri Wiirfel am Waage?  
denn due di nid beklaage  
füll us dr Schegg – e digge  
und due uns dermit begligge  
kasch se ha, mer liefere frei Huus  
wenn bis deerte längt em Traktor sy Pfuus

Mach uf dini millioneschweri Kische  
und due fir uns di Bargäld ryschte  
fir eimooligi Waage-Kunscht  
gisch du uns dini Gunscht  
fir Chegelwaggis-Kunscht duesch du zahle  
„bis z letscht“ in dim Lääbe kasch denn prahle